

OPŠTI USLOVI

za osiguranje od odgovornosti advokata

I. UVODNE ODREDBE

Pojedini izrazi u ovim Uslovima imaju slijedeća značenja:

- ”osiguravač” – društvo za osiguravanje s kojom je zaključen ugovor o osiguranju,
- ”ugovarač osiguranja” - lice koje sa osiguravačem zaključi ugovor o osiguranju,
- ”osiguraničnik” - lice čija je odgovornost pokrivena osiguranjem,
- advokatski pripravnik i ostalo osoblje su posloprimci, koji su u poslovnom odnosu s advokatom odnosno advokatskim društvom
- ”treće lice” - lice koje nije subjekat ugovora o osiguranju odnosno lice čija odgovornost nije pokrivena osiguranjem kao i radnik osiguraničnika,
- ”polica” je isprava o zaključenom ugovoru o osiguranju,
- ”suma osiguranja” - najviši iznos obaveze osiguravača za svaki osigurani slučaj,
- ”premija” - iznos koji se plaća za osiguranje na osnovu ugovora o osiguranju,
- ”polisa” - isprava o ugovoru o osiguranju,
- ”osigurani slučaj” - budući, neizvjestan i nezavisan od isključive volje osiguraničnika, štetni događaj koji ima za posljedicu nastajanje štete čiju bi naknadu moglo da zahtijeva treće oštećeno lice.

II. OPŠTE ODREDBE

Zaključenje ugovora o osiguranju

Član 1.

Ugovor o osiguranju zaključuje se na osnovu usmene ili pismene ponude, a zaključen je kad ugovarači potpišu policu osiguranja ili potvrdu o pokriću, odnosno kada u smislu Zakona o advokaturi Federacije Bosne i Hercegovine, advokat podnese zahtjev za osiguranje.

Usmena ponuda data osiguravaču za zaključenje ugovora o osiguranju ne obavezuje ni ponuđača ni osiguravača.

Ako osiguravač povodom primljene ponude zatraži kakvu dopunu ili izmjenu, kao dan primitka ponude smatrat će se dan kad osiguravač primi traženu dopunu ili izmjenu, odnosno kad bude obaviješten o prihvatanju njegovih uslova.

Odredbe ovog člana primjenjuju se i kad se mijenja postojeći ugovor o osiguranju.

Osiguranje za tuđi račun ili za račun koga se tiče

Član 2.

Ugovarač osiguranja ima pravo prvenstvene naplate potraživanja iz dugovane naknade, kao i pravo zahtijevati njihovu isplatu neposredno od osiguravača.

Način obavještanja

Član 3.

Sva obavještenja i prijave koje je Ugovarač osiguranja dužan dati u smislu odredaba ovih uslova osiguranja, obavezno se imaju pismeno potvrditi ako su date usmeno, telefonom, telegramom ili neki drugi način.

Kao dan primitka obavijesti odnosno prijave smatra se dan kad je primljena obavijest

odnosno prijava.

Ako se obavijest odnosno prijava šalje preporučeno, kao dan prijema smatra se dan predaje pošti.

Sporazumi koji se odnose na sadržaj ugovora vrijede samo ako su zaključeni pismeno.

Promjena adrese

– naziva (firme)

Član 4.

Ugovarač osiguranja dužan je o promjeni imena ili adrese, odnosno promjeni naziva – firme i sjedišta (poslovnih prostorija) obavijestiti osiguravača u roku od 15 dana od dana nastale promjene.

Ako Ugovarač osiguranja ne obavješti osiguravača o promjenama iz prethodnog stava, za vrijednost obavijesti dovoljno je da je osiguravač uputio osiguraniku preporučeno pismo prema posljednjim podacima o adresi stana, poslovnih prostorija, odnosno nazivu (firmi) kojima raspolaže, i obavještenje vrijedi od dana od kojeg bi u normalnim okolnostima vrijedilo da nije bilo promjena iz prethodnog stava.

Izmjene uslova osiguranja i tarife premija

Član 5.

Ako osiguravač izmjeni uslove osiguranja ili tarifu premija, dužan je o tome pismeno ili na drugi pogodan način obavijestiti Ugovarača osiguranja najkasnije šezdeset dana prije isteka tekuće godine osiguranja.

Ugovarač osiguranja ima pravo otkazati ugovor o osiguranju u roku od šezdeset dana od dana prijema obavijesti. U tom slučaju ugovor o osiguranju prestaje istekom tekuće godine osiguranja.

Ako Ugovarač osiguranja ne otkaže ugovor o osiguranju u roku iz stava (2) ovog člana, ugovor o osiguranju se početkom slijedećeg perioda osiguranja mijenja u skladu s provedenim promjenama u uslovima osiguranja, odnosno tarifi premija.

Utvrđivanje, procjena i vještačenje štete

Član 6.

Štetu utvrđuju i procjenjuju zajedno osiguranik i osiguravač, odnosno njihovi ovlašteni predstavnici.

U slučaju da se osiguranik i osiguravač ne slože pri utvrđivanju i procjeni štete, svaka od ugovorenih strana može zatražiti da štetu utvrde stručnjaci (vještaci).

Svaka od ugovornih strana pismeno imenuje svoga vještaka. Za vještaka se mogu imenovati lica koja nisu u poslovnom odnosu s osiguravačem odnosno osiguranikom. Prije početka vještačenja oba imenovana vještaka biraju trećeg vještaka kao predsjednika.

Predmet vještačenja mogu biti samo sporne činjenice. Koje će sporne činjenice biti predmet vještačenja i postupak vještačenja određuje u svakom pojedinom slučaju osiguranik i osiguravač pismenim sporazumom o vještačenju.

Svaka ugovorna strana snosi troškove za svoga vještaka.

Troškove za predsjednika snose obje strane napola.

Vraćanje premije

Član 7.

Prestankom ugovora o osiguranju prije isteka vremena za koje je premija plaćena, premija pripada osiguravaču samo do završetka dana do kojeg je on bio u obavezi, ako drugačije nije ugovoreno.

Posljedica raskida ugovora

Član 8.

Ako Ugovarač osiguranja raskine ugovor koji je zaključen na rok duži od 5 godina, dužan je platiti razliku premije za odobreni mu popust za trajanje osiguranja.

Obaveza osiguravača po zahtjevu oštećenog lica

Član 9.

Po zahtjevu za naknadu štete od strane oštećenog lica osiguravač je u obavezi:

1. da zajedno s osiguranikom preuzeme odbranu od neosnovanih ili pretjeranih zahtjeva za naknadu štete (pravna zastita),
2. udovoljiti osnovanim zahtjevima za naknadu štete (naknada štete) i
3. naknaditi troškove sudskog postupka (naknada troškova postupka).

Pravna zastita

Član 10.

Obaveza osiguravača na pružanju pravne zaštite obuhvata:

1. utvrđivanje da li postoji odgovornost osiguranika za nastalu štetu,
2. vođenje spora u ime osiguranika ako oštećeni ostvaruje pravo na naknadu štete u parničnom postupku,
3. davanje u ime osiguranika svih izjava koje smatra korisnim za zadovoljenje ili odbranu od neosnovanog ili pretjeranog zahtjeva za naknadu štete.

Uz saglasnost i uz upute osiguravača, vođenje spora može se povjeriti osiguraniku koji je u takvom slučaju dužan pridržavati se uputa i naloga osiguravača u pogledu vođenja postupka u parnici.

Osiguravač može preuzeti vođenje parnice ili stupiti na mjesto osiguranika ili sudjelovati u svojstvu umješaca.

Osiguravač je ovlašten da odbije vođenje spora ili da prepusti vođenje spora osiguraniku ako ocijeni da nema mjesta za pružanje pravne zaštite s obzirom na odnos visine zahtjeva za naknadu štete i visine sume osiguranja.

U slučaju da osiguravač, na ime naknade štete, isplati sumu osiguranja prije pokretanja spora, prestaje i njegova obaveza na pravnu zaštitu.

Naknada štete

Član 11.

Osiguravač je dužan isplatiti naknadu iz osiguranja u roku od 14 dana, računajući od dana kada je utvrđena njegova obaveza i visina te obaveze.

Osiguravač će isplatiti naknadu iz osiguranja na osnovu:

1. priznanja koje je dao ili odobrio,
2. nagodbe koju je zaključio ili odobrio ili
3. sudske odluke.

Ako osiguravač na ime naknade osiguraniku isplati ili položi ugovorenu sumu osiguranja, osiguravač se u tom tom slučaju oslobađa svih obaveza i postupaka u vezi s osiguranim slučajem.

Osiguravač sudjeluje u deponovanju radi osiguranja naknade štete koje bi osiguranik

bio dužan deponovati na osnovu zakonskih propisa ili sudske odluke i to najviše do iznosa visine njegove obaveze na naknadu štete.

Ako se osiguravač protivi prijedlogu osiguranika da se o zahtjevu za naknadu štete nagodi, dužan je platiti naknadu, kamate i troškove i onda kada prelaze sumu osiguranja.

Naknada troškova postupka

Član 12.

Osiguravač naknađuje sve troškove parničnog postupka ukoliko je sam vodio spor ili je dao saglasnost osiguraniku na vođenje spora, pa i onda kada zahtjev za naknadu štete nije bio osnovan.

Ako je parnica vođena bez znanja i saglasnosti osiguravača, osiguranjem su pokriveni troškovi spora, ukoliko zajedno s naknadom štete ne prelaze sumu osiguranja.

Osiguravač snosi troškove branioca u krivičnom postupku pokrenutom protiv osiguranika zbog događaja koji bi mogao imati za posljedicu postavljanje zahtjeva za naknadu štete na osnovu odgovornosti pokrivena osiguranjem i to samo izuzetno, ako je upoznat s izborom branioca, i prihvatio da snosi troškove.

Troškove krivičnog postupka, kao i troškove zastupanja oštećenog, osiguravač ne naknađuje.

Kada izvrši svoju obavezu isplatom sume osiguranja, osiguravač se oslobađa daljnih davanja na ime naknade i troškova po jednom osiguranom slučaju.

Neposredni zahtjev oštećenog lica

Član 13.

Ako oštećeno lice zahtjev ili tužbu za naknadu štete uputi samo prema osiguravaču, osiguravač će o tome obavijestiti osiguranika i pozvati ga da mu pruži sve potrebne podatke, a sam osiguranik će preduzeti mjere radi zaštite svojih interesa.

Ukoliko se u slučaju iz prethodnog stava osiguravač odluči isplatiti naknadu oštećenom, u potpunosti ili djelomično, dužan je o tome obavijestiti osiguranika. Osiguravač ne može izvršiti isplatu štete bez saglasnosti osiguranika. Ukoliko se osiguranik neosnovano protivi isplati štete, dužan je snositi sve štetne posljedice, koje bi iz toga proizašle (plaćanje veće odštete, kamata, troškova i slično).

III. POSEBNE ODREDBE

Predmet osiguranja

Član 14.

Predmet osiguranja, u smislu ovih Uslova, je zakonska odgovornost advokata za štetu, koju prouzrokuje trećim licima, obavljanjem advokature.

Osiguranjem je obuhvaćena i odgovornost advokatskih pripravnika, kao i ostalog osoblja, te privatna odgovornost advokata, izvan obavljanja djelatnosti uz posebno ugovoranje i plaćanje dopunske premije osiguranja.

Osiguranjem je obuhvaćena odgovornost iz obavljanja advokature za štetu koja nastane na području Bosne i Hercegovine, ukoliko se drugačije ne ugovori.

Član 15.

Advokatura je nezavisna i samostalna djelatnost koja osigurava pružanje svih oblika

pravne pomoći fizičkim i pravnim licima u ostvarivanju i zaštiti njihovih prava i pravnih interesa.

Pod oblicima pravne zaštite podrazumijeva se naročito:

- davanje pravnih savjeta
- sastavljanje isprava (ugovora, oporuka, izjava i dr.)
- sastavljanje tužbi, žalbi, prijedloga, zahtjeva, molbi, vanrednih pravnih lijekova i drugih pravnih podnesaka
- zastupanje stranki.

Član 16.

Osiguranjem po ovim uslovima nisu obuhvaćene štete od odgovornosti za propuste ili pogreške u obavljanju djelatnosti, koje su bile poznate u vrijeme zaključenja ugovora o osiguranju, ili nisu mogle ostati nepoznate.

Propust ili pogreška smatraju se poznatim kad ih osiguranik sam utvrdi ili za njih sazna, a da još nije postavljen odštetni zahtjev, a niti najavljen odštetni zahtjev tećeg lica.

U slučaju sumnje smatra se, da je propust ili pogreška učinjena onog dana, kad se neki od oblika pravne pomoći trebao najkasnije poduzeti, odnosno pogreška ispraviti, da se spriječi nastajanje štete, osim u slučaju uskraćivanja pravne pomoći zbog razloga koje propisuje zakon, statut komore i kodeks advokatske etike.

Član 17.

Suma osiguranja je gornja granica obaveze osiguravača po jednom osiguranom slučaju i ona iznosi 100.000 KM.

Osiguranik može ugovoriti sumu osiguranja veću od 100.000 KM.

Član 18.

Osiguranim slučajem u smislu ovih uslova smatra se svaki pojedinačno određeni propušten oblik pravne zaštite ili učinjena pogreška prema članu 15. stavu 2. ovih uslova, kojim se trećim licima prouzrokuje šteta.

Član 19.

Obaveza osiguravača počinje u smislu odredbi člana 1. ovih Uslova i traje koliko i obaveza advokata na naknadu štete u skladu s propisima građanskog prava.

Član 20.

Premija osiguranja plaća se odjednom unaprijed ili u ugovorenim rokovima.

Ako premija nije plaćena o dospelosti ugovorenog roka, osiguravaču pripada pravo na zakonsku zateznu kamatu od dana dospjeća do dana plaćanja rata.

Ako se premija plaća poštom, smatra se da je Ugovarač osiguranja uplatom dužnog iznosa pošti podmirio svoju obavezu prema osiguravaču.

Ako se premija plaća čekovnom uplatnicom na određeni račun osiguravača, smatra se da je Ugovarač osiguranja izvršio plaćanje premije onda kad uplati dužni iznos čekovnom uplatnicom u korist označenog računa osiguravača.

Kada Ugovarač osiguranja ispuni svoju obavezu plaćanja premije potpuno ili djelomično, ima pravo zahtijevati da mu osiguravač o tom ispostavi priznanicu o svom trošku. Iz opravdanih razloga može Ugovarač osiguranja tražiti ovu priznanicu i onda kad je novčanu obavezu isplatio preko banke ili pošte.

Član 21.

Ugovarač osiguranja dužan je prijaviti štetu u roku od 3 dana od dana nastanka osiguranog slučaja, odnosno od dana kad je za štetu doznao i mogao je prijaviti.

Ugovarač osiguranja dužan je neovisno od roka u kojemu je podnio prijavu štete, predstavniku osiguranja pružiti sve podatke i druge dokaze koji su potrebni za utvrđivanje uzroka, obima i visine štete. Osiguravač može isto tako zahtijevati da osiguranik pribavi i druge dokaze, ako je to nužno potrebno i opravdano.

Osiguranik je dužan obavijestiti osiguravača i onda kada zahtjev za naknadu štete protiv njega bude istaknut preko suda, kada bude stavljen u pritvor, kao i onda kada bude poveden postupak za osiguranje dokaza.

Ako je proveden izviđaj, podignuta optužnica ili je donesena odluka o krivičnom postupku, osiguranik je dužan o tome odmah obavijestiti osiguravača, pa i onda kada je već prijavio nastanak štetnog događaja. Takođe je dužan dostaviti nalaz nadležnog organa u vezi s nastalim štetnim događajem.

Osiguranik nije ovlašten da se bez prethodne saglasnosti osiguravača izjašnjava o zahtjevu za naknadu štete, a naročito da ga prizna potpuno ili djelomično, da se o zahtjevu za naknadu štete nagodi, kao ni da izvrši isplatu, osim ako se prema činjeničnom stanju nije moglo odbiti priznanje, nagodba odnosno isplata, a da se time ne učini očigledna nepravda.

Ako je osiguranik u zabludi smatrao da postoji njegova odgovornost ili da su ispravno utvrđene činjenice, to ga neće opravdati.

Ako oštećeni podnese tužbu za naknadu štete protiv osiguranika, osiguranik je dužan dostaviti osiguravaču sudski poziv odnosno tužbu i sve spise u vezi sa štetnim događajem i zahtjevom za naknadu štete kao i da vođenje spora prepusti osiguravaču.

Ako se osiguranik protivi prijedlogu osiguravača da se zahtjev za naknadu štete riješi nagodbom, osiguravač nije dužan platiti višak naknade, kamate i troškove koji su usljed toga nastali.

U slučaju da se oštećenik sa zahtjevom za naknadu štete neposredno obrati osiguravaču, osiguranik je dužan osiguravaču pružiti sve dokaze i podatke s kojima raspolaže, a koji su neophodni za utvrđivanje odgovornosti za pričinjenu štetu i za ocjenu osnovanosti zahtjeva, obima i visine štete.

Ukoliko se osiguranik ne pridržava obaveze iz ovog člana snositi će štetne posljedice koje uslijed toga nastanu, osim ako bi one nastale i da se je pridržavao obaveza.

Član 22.

Šteta se utvrđuje u skladu s odredbama Zakona o obligacionim odnosima.

Član 23.

Osiguravač će likvidirati iznos štete isplatiti u roku od 14 dana, kad je šteta likvidirana djelimično ili u cijelosti.

Član 24.

Osiguranje se ne odnosi na odštetne zahtjeve:

1. za smrt ili tjelesnu povredu lica i za oštećenje, uništenje ili nestanak stvari uključujući i krađu stvari trećih lica, osim ako je drugačije ugovoreno u smislu odredbi člana 14. stav 2 ovih uslova.
2. zbog ugovorenog proširenja odgovornosti osiguranika i na slučajeve kad po zakonu ne odgovara.
3. prouzrokovane posredno ili neposredno ratnim i političkim rizicima, bez obzira da

li je rat objavljen ili nije.

4. zbog neodržavanja ugovorenih rokova, ukoliko je za to odgovorna stranka koju advokat zastupa.

5. zbog prekoračenja ovlaštenja po punomoći.

6. zbog uskraćivanja pravne pomoći iz razloga koje propisuje Zakon, Statut komore i Kodeks advokatske etike.

7. zbog namjerne, grube nepažnje i prevare Ugovarača osiguranja ili osiguranika.

8. u svim slučajevima gdje se ne može utvrditi odgovornost Ugovarača osiguranja ili osiguranika u smislu Zakona i ovih uslova.

9. nastale po proteku 30 dana nakon otkaza punomoći, a ne radi se o slučajevima uskrate pravne pomoći u smislu Zakona o advokaturi.

10. za štetu na stvarima i licima uslijed zagađivanja tla i vode.

Član 25.

Ako je advokat štetu počinio trećem licu namjerno ili iz grube nepažnje, osiguravač koji je štetu naknadio ima pravo regresa prema advokatu, advokatskom društvu, ili advokatskom pripravniku.

Član 26.

Smatraće se da je advokat, odnosno advokatski pripravnik, učinio štetu namjerno, ako je kod obavljanja djelatnosti štetnu radnju učinio s voljom i znanjem;

Znanje i volja moraju se odnositi podjednako na uzrok i posljedicu štetne radnje.

Član 27.

Smatra se, da je advokat, odnosno advokatski pripravnik, štetu učinio iz grube nepažnje onda, kad je u obavljanju djelatnosti propustio onu pažnju koju bi u svom radu upotrijebio svaki prosječan čovjek.

Član 28.

Eventualne sporove iz primjene ovih uslova rješavat će stvarno nadležni Sud sjedišta osiguravača.